

譚襄敏公年譜稿

程時燧題



序

宜黃與南城在漢爲一縣，三國吳始析置。予遠祖西璧公避元亂居宜黃，西璧公之兄東璧公居崇仁，子孫皆蕃衍，居崇仁者曰歐坊，居宜黃者曰陽坊；九世祖時開公徙居南城；故予原籍宜黃，平生師友亦多宜黃人。嘗聞：宜黃譚襄敏公，生明正德十五年，歿萬曆五年，時東倭北虜，爲患孔棘，而公蕩滌瑕穢，始終兵事垂三十年，名位尙在戚南塘上，世稱譚戚。南塘有紀效新書，練兵實紀，止止堂集，後人復編戚少保年譜，聲名至今顯赫；而襄敏有功於世，爲世所忘，無以表揚鄉邦文獻，將「高山仰止景行行止」之謂何？此則茲譜之所由輯也。

客曰：「贛賢多矣，獨襄敏之譜何也？」曰：「武功文德，兼之濟濟。」

江右一人，惟譚司馬。膚功所奏，靖鄉捍邊，衡以今義，吾撫闡然。

不襄敏之譜而誰譜焉？」客曰：「用兵戰守，古今異宜。古之利器，今無所施；今之利器，古無所知。古人往矣，奚以譜爲？」曰：「譚公治兵，志在衛國，簡練師徒，嚴以紀律。敵臺三千，戰車七百，以守則固，以攻則克。使公生今日，功業所就，又烏能測？且歷史之所貴者教訓也。前事不忘，後事之師。明太祖列不庭之國，已慮遠而燭幾，至碧蹄館一役，乃愈兵連禍結，潰決而莫支。功如襄敏，後之人奈何弗思？」客曰：「子言善矣！顧良譜不易，舊譜既病簡略，復將何以譜之？」曰：「惟忠與勇，克固吾圉。公奏議十卷，遺文彙集三卷，稽諸明史，參諸地方志乘以及俞戚諸家之書，補苴舊文，大端舉矣。自愧不學，未能仰贊公於十一，秉燭餘明，孜孜汲汲，固將以盡匹夫之責」。客退，遂書以弁諸首。時中華民國二十五年十月十日也。

南城歐陽祖經序於南昌百花洲圖書館。

譚襄敏公年譜稿

南城歐陽祖經編著

明武宗正德十五年庚辰（公元一五二〇），公生，一歲。

公生於是年七月二十一日午時。據宜黃譚氏家乘。

明史本傳：譚綸，字子理，宜黃人。

張位撰譚襄敏公傳：公姓譚，諱綸，字子理，號二華，撫州宜黃人。張位，新建人。明隆慶進士，官至吏部尙

書。

清同治修宜黃縣志云：譚綸，字子理，一字二華，譚坊人。又云：字以詔，刺桑人。

宜黃縣，清屬江西省撫州府，民國元年十月，裁府留縣。清嘉慶一統志云：漢南城縣魏志：魏武帝臨汝縣地；三國吳太平二年，分置宜黃縣，屬臨川郡；晉及宋齊因之；隋省
光崇仁，唐武德五年復置宜黃縣，屬撫州；南唐立宜黃場，宋開寶三年升爲縣；仍屬

撫州；元屬撫州路；明屬撫州府。

宜黃居臨汝上游，宜水發源軍山，黃水源出黃土嶺，二水合而名縣也。

全縣疆域：東西廣八十里，南北袤一百七十里。

東至交陽嶺六十里
南城界

南至杉樹坳一百二十里
廣昌界

西至廖厓港六十里
樂安界

北至搗港五十里
臨川界

東南至箬嶺九十里
南城界

東北至禾嶺五十里
臨川界

西南至隘山一百二十里
甯都界

西北至孤嶺二十里
崇仁界

宜黃縣城，至南昌三百六十里。縣城外分三鄉：南曰崇賢鄉，東曰仙桂鄉，北曰待賢

鄉。縣志卷四云：「待賢鄉在城北，宜黃漳曹諸水合流城曲，經獅石而下，清波演迤，隨山曲折，或激而灘，或匯而淵，春水盛時，舟行一日可百里，長橋遠岸，豁若天開，潭坊其最著者。」

公遺集中有與俞邑侯書，自稱爲待鄉人。

祖廷用，以公貴屢贈至兵部尙書。見縣志選舉門。

父鎬，字宗周，號東吾，以選貢分教歸安，陞淮府教授。以公貴封兵部主事，再贈侍郎兼都御史，後贈兵部尙書。公前母黃夫人，繼母羅夫人。公之兄經，前母所生；公及弟綏，則繼母所生也。

正德十六年辛巳（一五二二），公二歲。

是年春三月十四日，武宗崩於豹房。皇太后以遺詔，遣官迎興世子厚熜入嗣皇帝位。

世宗嘉靖元年壬午（一五二二），公三歲。

春，甘肅軍亂，殺巡撫都御史許銘。

嘉靖二年癸未（一五二三），公四歲。

二月，提督軍務右都御史俞諫，討河南山東賊平之。

閏月，始修醮於宮中，詞臣多以青詞干進。

嘉靖三年甲申（一五二四），公五歲。

大禮議起，桂萼請改稱孝宗曰皇伯考，羣臣並排萼議。萼等驟貴用事，而羣臣或戍或杖，由是衣冠喪氣。

是年七月，土魯番圍肅州；八月，大同軍亂，殺巡撫都御史張文錦。

多十二月，起楊一清爲兵部尙書，總制三邊。一清，字應甯，安宜人。成化八年進士。凡三爲總制，曉暢邊事。

嘉靖四年乙酉（一五二五），公六歲。

是年五月三日，張居正生。居正字叔大，號太岳，湖北江陵人。

八月，田州指揮岑猛叛，詔都御史姚鏌討誅之。鏌字英之，慈谿人。

嘉靖五年丙戌（一五二六），公七歲。

二月，定有司久任法。五月，楊一清以吏部尚書復入閣。

嘉靖六年丁亥（一五二七），公八歲。

是年公就塾。公所作貢士任汴藩檢校鄒古潭先生傳云：「生子元明，穎慧絕倫，丁亥，延家大人於塾，予就業焉」。知公一生學業事功，得力於庭訓者深矣！

春二月，小王子寇宣府。

夏五月，總制兩廣軍務王守仁降附田州蠻。

嘉靖七年戊子（一五二八），公九歲。

是年二月，起王瓊爲兵部尚書，總制三邊。

秋七月，王守仁平斷藤峽獠。

閏十月朔，戚繼光生於濟甯南六十里之智橋。見戚少保年譜。

十一月，土魯番寇肅州。王瓊請令入貢，詔許之，遂棄哈密。

嘉靖八年己丑（一五二九），公十歲。

春正月，兵部尚書兼左都御史新建伯王守仁卒。

嘉靖九年庚寅（一五三〇），公十一歲。

夏四月，楊一清卒。

冬十一月，更定孔廟祀典，尊孔子曰至聖先師。

嘉靖十年辛卯（一五三一），公十二歲。

正月，桂萼以病乞歸。

嘉靖十一年壬辰（一五三二），公十三歲。

四月，復常遇春李文忠鄧愈湯和劉基世爵。

嘉靖十二年癸巳（一五三三），公十四歲。

冬十月，大同兵亂，殺總兵官李瑾。

嘉靖十三年甲午（一五三四），公十五歲。

世宗崇信道教，是年五月，御重華殿，召大學士張孚敬等五人，入觀祀天青爵，作紀樂同遊詩。

嘉靖十四年乙未（一五三五），公十六歲。

二月，遼東軍亂，囚巡撫都御史呂經。

俞大猷於是年登武會舉第五名，陞正千戶，視篆金門。俞大猷字志輔，晉江人。

嘉靖十五年丙申（一五三六），公十七歲。

正月，以劉天和爲兵部侍郎，總制三邊。

十二月，以道士邵元節爲禮部尙書。

嘉靖十六年丁酉（一五三七），公十八歲。

公於是年隨父歸安教諭任，與茅鹿門諸公共課文藝。（舊譜）。

縣志云：「公父性地端嚴，學術正大，由選貢分教歸安，諸生茅坤陸穩輩皆其造就」。

茅坤，字順甫，號鹿門。嘉靖十七年戊戌進士，知青陽丹徒二縣，擢部曹，出爲廣西

按察使簽事，遷副使，備兵大名，中吏議，歸林居五十餘載，年九十乃卒。以批選唐宋八大家文名重於世，自命有文武才，好談兵。嘉靖末年，東南患倭，胡宗憲爲督府，虛心咨訪，用其策爲多。

鹿門生於正德七年壬申，長公八歲。公薨後，鹿門致祭文有云：「方東吾先生之携公而教我湖也：公始垂髫，予已中第，公固羨予以脫穎而出，予亦奇公以處囊之異，道固琴瑟，誼亦兄弟」。足以窺公與鹿門交情之篤矣。

陸穩，字汝成。嘉靖二十三年甲辰與公同年進士。歷官江西左布政使。四十年閩廣山寇四起，流劫江西郡縣，擢穩右副都御史，巡撫南贛。

公兄經，字以訓。騰越州判，陞武定推官。公奏議中有比例陳情乞恩贈母一疏，內云：「臣自幼受學臣兄，致有今日。則前母黃氏，於臣雖無鞠育之恩，而能生臣兄以教臣，成就之恩，與鞠育等」。足見公家庭之中，慈孝友恭，和氣翔洽，薰育偉器，良非偶然。

二月，詔右都御史毛伯溫討安南，伯溫字汝厲，吉水人。俞大猷正氣堂集有上兩廣軍門東塘毛公平安南書。毛公果用其策，復遣使持書入安南，諭莫登庸，登庸銜壁面縛詣軍門降，安南平。

嘉靖十七年戊戌（一五三八），公十九歲。

十一月，巡按山西御史何贊疏言：「河套爲吉囊所據，外連西海，內構大同，宜急剿除。其要在於久任撫臣以責成效，興復屯法以裕邊儲」。議寢不行。

嘉靖十八年己亥（一五三九），公二十歲。

二月，立載壑爲皇太子，封載垕爲裕王，載圳爲景王。

嘉靖十九年庚子（一五四〇），公二十一歲。

世宗溺於神仙，日事齋醮，八月，諭廷臣令太子監國。大僕卿楊最切諫，下詔獄杖殺之；監國議亦罷。

九月，劉天和敗吉囊於黑水苑，斬其子小十王。吉囊連年入寇，邊將禦之，屢被殺傷。

。是年七月寇萬全衛，九月復寇固原。天和遣總兵周尙文大破敵於黑水苑，斬吉囊子小十王，寇遁走。

嘉靖二十年辛丑（一五四一），公二十二歲。

夏四月，置安南都統使司。

嘉靖二十一年壬寅（一五四二），公二十三歲。

六月，俺答（一作諸達）寇山西。時吉囊已死，諸子狼台吉等散處河西，勢既分，俺答獨盛。至是入寇山西，參將張世忠戰死。詔天下舉武勇士，俞大猷詣巡按御史自薦。

夏言罷，以嚴嵩爲武英閣大學士。

嘉靖二十二年癸卯（一五四三），公二十四歲。

是年公舉於鄉。（舊譜）。

張傳：公生而沈雄，多大略，於書無所不窺，志閒而氣愉。弱冠以儒士舉嘉靖癸卯鄉試。

十月，朶顏入寇。

嘉靖二十三年甲辰（一五四四），公二十五歲。

公是年聯捷成進士。縣志：嘉靖二十三年甲辰秦鳴雷榜。

十月，俺答與小王子入萬全右衛，掠蔚州，抵完縣，京師戒嚴。

公釋褐之初，海內已漸多故，東倭北虜，伺隙而動。而朝野上下，熟視無覩。天子以齋醮爲廟謨，宰衡以欺罔爲相業，虐及黎庶，毒流搢紳。蓋厝火積薪，未足喻其危殆矣！

嘉靖二十四年乙巳（一五四五），公二十六歲。

公於是年十二月，除授南京禮部祠祭清吏司主事。（舊譜）。

續文獻通考：明禮部掌禮儀祭祀宴饗貢舉之政令。尙書一人，侍郎左右各一人。所屬儀制祠祭主客精膳四清吏司。各郎中員外郎一人，主事一人。儀制分掌諸禮文宗封貢舉學校之事，祠祭分掌諸祀典及天文國恤廟諱之事，主客分掌諸蕃朝貢接待給賜之事。

，精膳分掌宴饗牲豆酒膳之事。南京禮部尙書一人，右侍郎一人。所屬儀制祠祭主客精膳四司。

嘉靖二十五年丙午（一五四六），公二十七歲。

公在禮部。

是年三月，四川白草番亂，遣何卿充總兵官討平之。卿素有威望，終嘉靖世，松潘鎮號得人，邊境安堵。

四月，以兵部侍郎曾銑總督陝西三邊軍務。是冬俺答以十萬騎入掠延安慶陽，銑率兵數千駐塞門，而遣前參將李珍搗巢於馬梁山後，敵乃退。

嘉靖二十六年丁未（一五四七），公二十八歲。

公在禮部。

是年張居正成進士，選庶吉士。

明初定制，片板不許入海，承平久，奸民闌出入，勾倭人入互市，閩人李光頭歛人許

棟路甯波之雙嶼（嶼今爲象山屬，在舟山東南。）

爲之司質契，勢家護持之。將吏不敢詰也。或負其

通，棟等卽誘之攻剽，海防久墜，剽掠輒得志，來者接踵。二十五年倭寇犯甯波。二

十六年以右副都御史朱統巡撫浙江。（統字子純，長洲人。）

浙江通志：海中山巒錯列，林木蒙翳，亡命奸徒，易於盤據，元末方國珍乘之以據浙東。

天下郡國利病書：國家初平海內，所殲滅郡雄，方若張皆在海中，故部黨連誅不能出者，則竄而之海島，糾羣倭入寇。以故倭警之發，乃在國初時。

浙江通志引譚海圖編：湯信國經理海防，北起乍浦，南迄蒲門，縈紆二千餘里。設九衛及諸所諸巡司，總有百城。營寨烽堠，彼此聯絡援應，血脈貫通。

郡國利病書：至嘉靖中，海船廢盡，馬額亦減，武備衰耗已極，而倭變適大作。

浙江通志引肅皇外史：嘉靖二十六年，巡按御史陳九德，請置大臣兼巡福浙海道，從之。以朱統巡撫浙江。統至浙，知沿海大姓，皆利番舶勾連主藏，轉鬻其貨，牟利潤

己，久不歸值，遂構難有所殺傷，乃下令申嚴海禁，凡雙橋餘皇一切毀之。

明史世宗紀：二十六年十二月，乙亥，海寇犯甯波。

明史食貨志：倭寇百艘，久泊甯台，數千人登岸焚劫。浙江巡撫朱執訪知舶主皆貴官大姓，市番貨皆以虛直轉鬻牟利，而直不時給，以是構亂。乃嚴海禁，毀餘皇，奏請鑄諭戒大姓，不報。

嘉靖二十七年戊申（一五四八），公二十九歲。

公在禮部，著有禮刑一德論。（舊譜）。

三月，總督侍郎曾銑被殺。先是銑力倡復套之議，謂：「賊據河套，今將百年，出套則寇宜大三關以震畿服，入套則寇延甯甘固以擾關中。臣請以銳卒六萬，益以山東鎗手二千，每歲春夏交，攜五十日餉，直搗其巢，礮火雷擊，如是三舉，則寇自不能支。」。世宗壯其議，令夏言擬旨優獎之。銑益銳志出師。未幾忽降旨切責，詞甚厲。嚴嵩力言河套不可復，兵部侍郎萬鎮等劾銑罔上貪功，擅開邊釁，逮下獄，嚴嵩極力構